

## Naqqiut

Akissuteqaat 29. september 2021-imeersoq taarserpaa  
(Akissuteqaammi Naalakkersuisut innersuussutaanni immikkoortumi kingullermi naqqiisoqarpoq).

**Kinguaassiuutitigut atornerluisoqarsimatillugu pineqaatissiisarnerup sakkortusinissaanik nunatsinni unnerluussisussaataasut kaammattorneqarnissaat siunertaralugu Naalagaaffeqatigiinnermi oqartussaasut saaffigineqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.**

(Atassutip Inatsisartuni ilaasortai)

### Akissuteqaat

(Ineqarnermut, Attaveqatigiinnermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

### Siullermeerneqarnera

Atassutip Inatsisartunut ilaasortai aalajangiiffigisassatut siunnersuummik tamatsinnut sunniuteqartumik saqqummiussimmata Naalakkersuisut qutsavigaat.

Kinguaassiuutitigut atornerluinerit tamatta akiorusuppagut, aamma tamatuma peqatigisaanik kannguttaatsuliortunik ikiuinissamat periarfissat pitsanngorsanngikkaanni, pineqaatissiinerit sakkortusineri namminneq ajornartorsiummut iluaqutaanaviannimmata Naalakkersuisut isumaqatigaat.

Tamanna tunggavigalugu uani ataatsimiinnermi pinerluttulerinermi inatsisip allannguutissaanik Naalakkersuisut siunnersuuteqarput (UKA2021/157) tassanilu meeqqanik kinguaassiuutitigut atornerluisarnerup annertunerusumik pitsaaliorneqarnissaa anguniarneqassasoq siunertarineqarpoq. Inunnut 18-it inorlugit ukiulinnut pinngitsaaliilluni atoqateqarneq allatulluunniit kinguaassiuutitigut atoqatiginninnerit sakkortunermik pineqaatissiissutaasalernissaa siunnersuutip imaraa. Tassunga atatillugu pineqaatissiisarnerup ullumimut sanilliullugu 50 pct.-imik qaffanneqarnissaa piumasaqaataassaaq, taamaalilluni, iliuuserineqartumut atatillugu pinerlineqartup kanngunarsarneqarnera, pineqaatissiinerup annertunerusumik ersersissavaa.

Taamaaliornikkutaaq kinguaassiuutitigut atornerluisut Nuummi Inissiisarfimmuut nuunneqarsinnaanissaat siunnersuutip periarfissippaa, tassani kinguaassiuutitigut atornerluisoqaqqinnissaa pitsaaliorniarlugu katsorsaavimmik pilersitsisoqassalluni. Inatsisissatut siunnersuummi ilaasut taakku ilaatigut kalaallit qallunaallu suleqatigiissitaasa, meeqqat inuusuttullu aarlerinartorsiortut atugaannik pitsanngorsaanissamik tigussaasunik siunnersuuteqartussaasut, innersuussutaat naammassissavaat. Suleqatigiissitap inassuteqaatai nalunaarusiami "Kalaallit Nunaanni meeqqanut inuusuttunullu atugarliortunut pitsaaneruseqarnissaq pillugu kalaallit qallunaallu oqartussaasoqarfiisa assigiinngitsunik suliallit akornanni suleqatigiinneq"-mi august 2020-mi tamanut saqqummiunneqarput.

Tamatuma peqatigisaanik Kinguaassiutitigut meeqqanik atornerluisoqarsimatillugu pineqaatissiisarnerup sakkortusinissaanik nunatsinni unnerluussisussaataasut kaammattorneqarnissaat<sup>1</sup> pillugu Inatsisartut aalajangiussaata inatsisissatut siunnersuummi naammassineqarpoq. Tamatuma peqatigisaanik inunnut ulorianartumik pinerluuteqarsimaneq pillugu suliani ilungersunartuni pineqaatissiisarnerup sivitsorneqarnissaat siunertaralugu pinerluttulerinermi inatsimmi § 147 malillugu pineqaatissiisarnerup qaffanneqarnissaata anguniarneqarnissaa pillugu Naalakkersuisut inatsisunik atortitsinermut ministerimut noqqaassutaannut inatsisissatut siunnersuut naleqquttuuvoq. Pinerluttulerinermi inatsimmi tassuuna allannguinnikkut kinguaassiutitigut kannguttaatsulernermik suliani pineqaatissiinerit sakkortusineqarnissaat aamma periarfissinneqassaaq.

Taamaalillutik siunnersuummi siunertarineqartut piviusunngortinnissaannut Naalakkersuisut eqeersimaartumik suliniuteqareerput.

Taamaammat allannguutissatut siunnersuut tulliuuttoq Naalakkersuisut saqqummiuppaat:

“Eqqartuusseriaatsimi pingaarnertut tunngaviit pillugit, matumani pineqaatissiisarnerit annertussusaat siviussusaallu ilanngullugit, inuiaqatigiinni kiisalu kattuffiit attuumassuteqartut peqatigalugit nuna tamakkerlugu oqallisiginninnissamut Naalakkersuisut piareersaanissaannik peqqunneqarnissaat pillugu Inatsisartut aalajangiiffigisassaattut siunnersuut”.

---

<sup>1</sup>UKA 2019/138